

上元縣志



邑獻

漢張磐字子石丹陽人爲交阯刺史以清白稱時荊州賊胡蘭餘黨南走蒼梧刺史度尚懼爲已責乃僞上言蒼梧賊入荊州界遂徵磐下廷尉辭狀未正會赦見原磐不肯出獄更牢持械節獄吏謂磐曰天恩曠然而君不出何也磐因自列曰磐備位方伯爲國爪牙而爲尚所枉受罪牢獄夫事有虛實法有是非磐實不辜赦無所除如忍以苟免永受侵辱之耻生爲惡吏死爲敝鬼乞傳尚詣廷尉

面對曲直足明眞僞尚不徵者磐埋骨牢檻終不虛出望塵受枉廷尉以其狀上詔書徵尚到廷尉辭窮獲罪以先有功邀原磐後爲廬江太守陶謙字恭祖丹陽人少學爲諸生性剛直有大節舉茂才察孝廉拜尚書郎除舒令在官清白遷幽州刺史叅車騎將軍張溫軍西討韓遂邊章軍還會徐州黃巾起以謙爲刺史討黃巾大破之時李郭作亂四方斷絕謙每遣使間行奉貢西京詔遷爲徐州牧封溧陽侯流民多歸之會曹操父嵩辟難瑯琊謙別將襲殺之操欲伐謙而畏其強乃表請

州郡罷兵謙上書言克難平亂非兵不濟今妖寇類衆殊不畏死且屯結連兵至今爲患今日兵罷明日難必至令群凶日月滋蔓非所以強幹弱枝遏惡止亂也輒勒部曲申令警備冀効微勞以贖罪負操得書遂擊謙破彭城傅陽謙退保郟操攻之不克還拔取慮睢陵夏丘皆屠之三輔百姓依謙者殲焉其後操復擊謙畧定琅琊東海諸縣謙懼不免欲走歸丹陽會呂布據兗州操還擊布是歲謙病卒

論曰桓帝時長沙賊胡蘭作難荊州散入交阯磐

上元縣志

卷十六

邑獻

二

躬擐甲冑斬殄渠帥餘燼竄還而竟以度尚誣奏下獄人臣立功於外不幸而爲讒言構陷豈少哉陶謙任徐州刺史會別將襲殺操父嵩構釁操屢擊謙敗假令謙在位舉賢任能政刑得理則亦何懼於操而欲爲引避也

吳張悌字巨先少有名望孫休時爲丞相晉之伐吳也悌督沈瑩諸葛靚逆之牛渚軍敗績靚退走以一介迎悌去悌不可靚自往牽之曰天下存亡冥會有極豈卿一人所知何故自令死辱爲悌垂涕謂靚曰仲思今日是吾死日也我兒時爲卿家丞

相所拔常恐不得死所負名賢國士知耳今以身  
殉社稷何不足吾所乃復遁耶死之悌宅在板橋  
浦死葬其地

石偉字公操好學秉節仕吳爲光祿大夫因家金陵  
吳亡晉太康二年詔偉秉志清白皓首不渝加二  
千石以終厥世偉佯狂不受

陸機字士衡吳郡人祖遜吳丞相父抗大司馬機少  
有異才文章冠世抗卒領父兵爲牙門將居金陵  
年二十而吳滅閉門勤學積有十年太康末與弟  
雲俱入洛造太常張華華素重其名如舊相識曰

上元縣志

卷十六

邑獻

三

伐吳之役利獲二陸成都王穎假機後將軍河北  
大都督率諸軍二十餘萬討長沙王乂戰敗宦人  
孟玖譖之穎怒收機遂遇害臨刑歎曰華亭鶴唳  
可復聞乎機天才秀逸詞藻宏麗張華嘗謂之曰  
人之爲文常恨才少而子更患其多弟雲嘗與書  
曰君苗見兄文輒欲燒其筆硯其爲人所推服如  
此雲字士龍六歲能屬文與兄機齊名雖文章不  
及機而持論過之號曰二陸爲成都王穎右司馬  
與機同遇害

晉郭璞字景純聞喜人好經術博學有高才而訥於

言論詞賦爲中興之冠好古文奇字妙於陰陽筭  
歷雖京房管輅不能過也王導引叅已軍事帝與  
導令璞筮皆有奇應帝深重之璞因天人休咎之  
徵輒上疏論時政遷尚書郎數言便宜多所匡益  
明帝在東宮與溫嶠庾亮有布衣之好璞亦以才  
學見重埒於嶠亮後王敦起璞爲記室叅軍敦之  
謀逆也嶠亮使璞筮之璞對不決嶠亮復令占已  
之吉凶璞曰大吉嶠等退相謂曰璞對不了是不  
敢有言或天奪敦魄今吾等與國家共舉大事而  
璞云大吉是爲舉事必有成也於是勸帝討敦敦

上元縣志

卷十六

邑獻

四

將舉兵使璞筮璞曰無成敦固疑璞之勸嶠亮又  
聞卦凶乃問璞曰卿更筮吾壽幾何答曰思向卦  
明公起事禍必不久若住武昌壽不可測敦大怒  
曰卿壽幾何曰命盡今日日中敦怒遂斬之年四  
十九墓在鍾山

范甯字武子其先南陽人少篤學多所通覽痛時尚  
浮虛儒雅日替嘗著論以王弼何晏之罪深於桀  
紂累官中書侍郎在職多所獻替時更營新廟博  
求辟雍明堂之制甯據經傳奏上皆有典證孝武  
帝雅好文學甚被親愛朝廷疑議輒諮訪之出爲

豫章太守在郡大設庠序又起學臺功用彌廣江州刺史王凝之上言孝武以此抵罪會赦免官家於丹陽猶勤經學終年不輟年六十三卒於家初甯以春秋穀梁氏未有善釋沉思積年爲之集解其義精審爲世所重

**宋**到溉字茂灌曾祖彥之宋驃騎將軍遂家建康溉少孤貧聰敏有才學早爲任昉所知由是聲名益廣起家爲湘東王長史梁武帝勅曰到溉非直爲汝從事足爲汝師間有進止每須詢訪遭母憂居喪盡禮服闋猶蔬食布衣者累載除江夏太守入

上元縣志

卷十六

邑獻

五

爲左民部尚書卒年七十二弟洽字茂洽亦聰慧文詞敏贍天監中與溉俱擢用而洽尤見知賞從弟沆亦有時名

**梁**沈約字休文吳興武康人幼孤貧篤志好學晝夜不釋卷博通群籍善屬文梁武在西邸與約遊舊後佐命爲尚書僕射立宅東田矚望郊阜嘗爲郊居賦以序其事約左目重瞳子腰有紫痣聰明過人好墳典聚書至二萬卷都下無比歷事三代該悉舊章博物洽聞當世取則謝元暉善爲詩任彥昇工於筆約兼而有之不能過也著宋書一百卷

齊紀二十卷梁武紀十四卷又撰四聲譜卒謚隱侯

何點字子皙廬江人年十一居父母喪幾至滅性及長博通群書善談論士大夫多慕從之號曰遊俠處士從弟遁以東籬門園居之孔德璋爲築室焉豫章王疑命駕造點點從後門去司徒竟陵王子良聞之曰豫章王尚望塵不及吾當望岫息心梁武帝與點有舊及踐祚召見於華林園賜詩酒恩禮如故仍下詔徵爲侍郎掾帝鬚曰乃欲臣老子邪辭疾不起詔所在資給之初兄求隱吳郡虎北

上元縣志

卷十六

邑獻

六

山卒弟亂爲中書令亦棄官遊會稽世謂何氏三高

蕭眎素蘭陵人思話孫也天監中拜丹陽丞武帝賜錢八萬眎素盡散之性靜好學能清言榮利不關於口士咸敬之久居建康有終焉之志乃築室攝山徵爲中書侍郎不就獨居屏事非親戚不得至其籬門

淳于量字思明其先濟北人世居建業量偉姿容有幹畧便弓馬以軍功封晉陵男侯景陷臺城元帝承制以爲巴州刺史景西攻巴州與王僧辯并力

拒景大敗之擒其將任約宋子仙景平封謝沐縣侯桂陽刺史入陳以功進封陵縣公卒贈司空論曰張巨先以身殉吳得死所矣石公操佯狂不受晉祿終始一吳也陸士衡弟不可復聞郭景純妙陰陽筭歷命盡今日天實爲之范武子著作多所典證到茂灌起家長史是皆學古有獲者沈休文宅東田作郊居賦泊如也何子皙宅東籬門園蕭眎素築室攝山介哉淳于思明拒侯景封謝沐縣侯謂之壯也亦宜

**梁**蕭統字德施小字維摩武帝長子也生而聰穎三

上元縣志

卷十六

邑獻

七

歲授孝經論語五歲遍讀五經悉通諷誦天監十四年帝臨軒冠太子於太極殿舊制太子著遠遊冠金蟬翠綉纓至是詔加金博山太子美姿容善舉止尤引納文學之士討論墳籍時東宮有書凡三萬卷名流並集晉宋以來未之或有嘗泛舟後池番禺侯軌盛稱此中宜女樂不答咏左思招隱詩曰何必絲與竹山水有清音軌慙而止每入朝未五更危坐達旦雖東宮燕處必西南向臺省疾篤左右欲啟聞不許曰云何令至尊知我如此惡因便嗚咽其孝謹如此薨時年三十一謚昭明

鄉祀

賢

周捨字昇逸其上世汝南安成人父顥字彥倫精譚佛理兼善老易於鍾山西立隱舍休沐歸之因家焉捨弱冠舉秀才除太學博士王亮尹丹陽辟爲主簿政事多委焉遷太常丞梁武帝卽位吏部尚書范雲與顥素善重捨才器言之武帝召拜尚書祠部郎禮儀損益多自捨出累遷吏部郎武帝以爲有公輔器范雲卒捨與徐勉同叅國政雅量不及勉而清簡過之有文集二十卷

論曰武帝大弘佛教昭明亦於宮內別建慧義殿爲法集之所其於帝王平治之道失之遠矣捨父顥精譚玄理秋菘春韭世味澹然臨終謂捨曰汝不患不富貴但當將之以道德固嘗教之以正也捨之爲時賢相有以也夫

**晉**陶璜秣陵人父基吳交州刺史璜仕吳歷顯位孫皓時交阯太守孫譚貪暴爲百姓患會察戰鄧荀至擅調孔雀三千頭遣送秣陵郡中旣苦遠役遂爲亂殺譚及荀附於晉武帝晉遣兵守之吳以璜爲將從薛琚拒戰不利琚欲還璜夜以兵數百襲晉兵獲其寶物歸又從海道出其不意徑陷交阯

吳因用璜爲交州刺史璜有謀策周窮好施能得人心皓以璜爲使持節都督交州諸軍事前將軍交州牧在南三十年威惠著於殊俗及卒舉州號慟子威領交州刺史甚得士心威弟淑子綏後並爲交州自甚至綏四世爲交州者五人璜弟濬吳鎮南大將軍荊州牧濬弟抗太子中庶子濬子湮字恭之湮弟猷字恭豫並有名湮至臨海太守黃門侍郎猷宣城內史王導右軍長史湮子馥于湖令抗子回有傳

紀瞻字思遠秣陵人以方直名舉秀才永康初州又

上元縣志

卷十六

邑獻

九

舉寒素大司馬辟東閣祭酒其年除鄢陵公國相不之官明年左降松滋侯相太安中棄官歸與顧榮等共誅陳敏召拜尚書郎赴洛至徐州聞亂曰甚奔還揚州元帝爲安東將軍引爲軍祭酒轉鎮東長史親幸其宅與之同乘而歸及長安不守與王導俱入勸進元帝不許使殿中將軍韓績撤去御座瞻叱曰帝座上應星宿敢有動者斬元帝爲之改容及踐位拜侍中轉尚書上疏諫諍多所匡益明帝嘗獨引瞻於廣室慨然曰社稷之臣無復十人如何因屈指曰君便其一瞻辭讓帝曰方

欲與君善語復云何崇謙讓邪瞻才兼文武忠亮  
雅正以久病請去官不聽王敦之逆帝使謂瞻曰  
卿雖病但爲朕卧護六軍所益多矣尋卒時年七

十二册贈本官儀同三司謚曰穆

祀鄉賢

樂道融丹陽人少有大志好學不倦與友朋信有國  
士風爲王敦叅軍敦將圖逆使召甘卓卓遲疑未  
赴敦遣道融召之道融因說卓曰王敦背恩不道  
國家待君至厚今若附之豈不負義君當僞許應  
命而馳襲武昌敦衆聞之必不戰自敗大勲可集  
矣卓喜乃陳敦過逆發兵討之卓兄子印時爲敦  
叅軍敦使印求和於卓令其旋軍卓信之道融曰  
將軍起義兵而中廢爲敗軍之將竊爲將軍不取  
也卓不從融晝夜涕泣憂憤而死

薛兼字令史丹陽人祖綜仕吳爲尚書僕射父瑩晉  
散騎常侍兼清素有器宇少與同郡紀瞻廣陵閔  
鴻吳郡顧榮會稽賀循齊名號爲五雋初入洛司  
空張華見而奇之曰皆南金也元帝爲安東將軍  
以爲軍諮祭酒稍遷丞相長史甚勤王事以上佐  
祿優每自約損取周而已進爵安鄉縣侯拜丹陽  
太守遷尚書領太子少傅自綜至兼三世傳東宮

特加尊禮卒贈左光祿大夫開府儀同三司及葬屬王敦作逆不得議謚遣使者祭以太牢

張闓字敬緒丹陽人昭之曾孫少孤有志操太常薛兼進之於元帝引爲安東叅軍轉丞相從事中郎以母憂去職既葬帝強起之以佐翼勲賜爵丹陽縣侯遷侍中元帝踐祚出補晉陵內史在郡甚有威惠所部四縣並以旱失田闓乃立曲阿新豐塘溉田八百餘頃歲豐稔以擅興造免官公卿並爲言曰張闓興陂溉田可謂益國而反被黜使臣下難復爲善元帝感悟乃下詔曰丹陽侯闓昔以勞

上元縣志

卷十六

邑獻

十一

役部人免官雖從吏議猶未掩其忠節之志也倉廩國之大本宜得其才今以闓爲大司農闓陳黜免始爾不宜便居九列疏奏不許元帝崩闓營建平陵事畢遷尚書蘇峻之役闓與陶回共督丹陽義軍又與蔡謨虞潭王舒等招集義兵以討峻峻平賜爵宜陽伯遷廷尉以疾解職拜金紫光祿大夫尋卒

陶回璜從子司空王導引爲司馬蘇峻之役回與孔坦言於導請早出兵守江口峻將至回復謂庾亮曰峻知石頭有重戍不敢直下必向小丹陽南道

步來伏兵要之可一戰而禽亮不從峻果由小丹陽經秣陵迷失道夜行無復部分亮深悔之尋王師敗績回還邑收合義軍得千餘人與陶侃溫嶠等並力攻峻又別破韓晃以功封康樂伯累遷吳興太守時人飢穀貴回輒便開倉及割府郡軍資數萬斛米以救乏絕一境獲全既而下詔並勅會稽吳郡依回賑恤二郡賴之回性雅正不憚強禦丹陽尹桓 佞事王導甚爲導所昵會熒惑守南斗經旬 語回曰南斗揚州分熒惑守之吾當遜位以厭此譴回答曰公以明德作相輔弼聖主當

親忠貞遠邪佞而與桓景造膝熒惑何由退舍導深愧之卒謚曰威

論曰陶璜四世任交州刺史威信及於殊俗美矣紀瞻殫忠晉室明帝慨然引瞻獨語倘所謂社稷之臣非耶道融爲王敦叅軍忿其逆節勸卓起義兵中渝憂死可謂大節不奪者矣薛兼傳東宮明帝特加尊禮張闓始以在郡勞役免官蘇峻之亂督丹陽義軍討峻以功賜爵陶回係璜從子守吳興時民飢穀貴開倉廩賑之一境獲全

王導字茂弘其先臨沂人光祿大夫覽之孫少有風

鑒識量清遠元帝爲瑯琊王與導素親善帝出鎮  
邳請導爲安東司馬軍謀密策知無不爲及徙  
鎮建康吳人未附導患之會上已觀禊帝乘肩輿  
具威儀導及兄敦率諸名勝皆騎從紀瞻賀循顧  
榮竊覘之乃相率拜於道左導爲政務在清靜每  
勸帝克己勵節 見委仗桓爨初過江慮朝廷微  
弱往見導極 世事還謂周顛曰向見管夷吾無  
復憂矣及 隗用事導漸見疎遠敦反隗請悉誅  
王氏導 羣從子姪二十餘人每旦詣臺待罪帝  
以導忠節有素時還朝服召見之曰導以大義滅

親可以吾爲安東時節假之敦時寢疾導率子弟  
發哀衆聞謂敦死咸有奮志敦平進封始興郡公  
明帝崩與庾亮等同受遺詔輔幼主是爲成帝庾  
亮將徵蘇峻訪之於導導固爭不從旣而難作導  
入宮侍衛謀奉帝出奔不果及事平朝議遷都曰  
建康古之金陵舊爲帝里古之帝王不以豐儉移  
都宜鎮以靜羣情自安導簡素寡欲倉無儲穀衣  
不重帛卒時年六十四成帝舉哀於朝堂喪事帽  
之禮一依漢博陸侯及安平獻王故事自導渡  
江子孫遂家建業衣冠人物一時爲盛

謝安字安石陳郡陽夏人少有重名朝命敦辟皆不就人爲語曰安石不起當如蒼生何年四十餘征西大將軍桓溫請爲司馬旣到溫深重之徵拜侍中吏部尚書中護軍簡文崩溫入赴山林止新亭大陳兵衛延見朝士或言將害王謝遂移晉室坦之甚懼見溫流汗沾衣倒執手板安從容就席坐定謂溫曰安聞諸侯有道守在四鄰明公何須壁後置人邪溫曰正自不能不爾遂笑語移日時孝武帝富於春秋政不自己溫威振內外人情嗜嗜互生同異安盡忠匡翼終能輯穆及溫病篤諷朝

上元縣志

卷十六

邑獻

十四

廷加九錫使袁安具草安見輒改之由是歷旬不就會溫薨錫命遂寢尋爲尚書僕射詔總關中軍事苻堅率衆號百萬入寇次於淮淝京師震恐加安征討大都督玄入問計安夷然無懼色答曰已別有旨旣而寂然玄不敢復言乃令張元重請安遂命駕出山墅親朋畢集方與玄圍棋賭別墅安棋常劣於玄是日玄懼便爲敵手而又不勝安遂遊陟至夜乃還指授將帥各當其任玄等旣破堅有驛書至安方對客圍棋看書竟便攝放床上了無喜色棋如故客問之徐答云小兒輩遂已破賊

既罷還內過戶限心喜甚不覺屐齒折其矯情鎮物如此會稽王道子專權安出鎮廣陵築新室而居之安雖受朝寄然東山之志始末不渝每形於言色及鎮新城盡室而行雅志未就尋卒贈太傅謚文靖安避亂渡江遂家建業衣冠人物與王導等時稱江左王謝

顏含字弘都臨沂人少有操行以孝友聞元帝時過江累遷光祿勳乞遜位成帝美其素行就加光祿大夫賜床帳被褥勅大官四時致膳固辭不受於時論者以王導帝之師傅名位隆重百僚宜爲降

上元縣志

卷十六

邑獻

十五

禮太常馮懷以問於含含曰王公雖重禮無偏敬降禮之言或是諸君事宜鄙人老矣不識時務旣而告人曰吾聞伐國不問仁人向馮祖思問佞於我我豈有邪德乎郭璞嘗遇含欲爲之筮含曰年在天位在人修已而天不與者命也守道而人不知者性也自有性命無勞蒼龜或問江左羣士優劣答曰周伯仁之正鄧伯道之清卞望之之節他則吾不知致仕二十餘年年九十三卒自含渡江九世皆塋建康曾孫延之有名於宋

王諒字幼成丹陽人少有幹畧永興三年爲交州刺

史初以王機爲刺史新昌太守梁碩發兵拒機自領交阯太守迎前刺史修則子湛行州事諒旣到境湛退還九真廣州刺史陶侃遣人誘湛來詣諒所諒執之碩時在坐曰湛故州將之子有罪可遣不可殺也諒不聽卽斬之碩怒而出諒使客刺之弗克碩遂率衆圍諒於龍編陶侃遣軍救之未至而諒敗碩逼諒奪其節諒固執不與斷諒右臂諒正色曰死且不畏臂斷何爲十餘日憤恚而卒賀循字彥先會稽山陰人其先慶普漢世傳禮世所謂慶氏學族高祖純博學有重名漢安帝時爲侍

上元縣志

卷十六

邑獻

十六

中避帝父諱改賀氏曾大父以下俱仕吳循操尚高厲童胤不羣言行進止必以禮讓陸機上疏薦之召補太子舍人轉侍御史辭疾去職石冰亂揚州循與王矩顧祕周玘等討平之卽謝兵事杜門不與功賞陳敏之亂詐稱詔書以循爲丹陽內史循託疾辭之敏不敢逼敏平徵辟皆不就元帝遷鎮東將軍引以爲軍司敦逼不得已乃輦疾至建業元帝親幸其舟側諮政道循羸疾不堪拜謁乃就加朝服賜第一區車馬床帳衣褥等物循一無所受建武初改拜太常時朝廷新建凡有疑滯皆

諮之輒依禮經以對其後以循清貧賜六尺床薦  
席褥並錢二十萬循不得已留之初不服用及踐  
位以循行太子太傅固讓不許疾漸篤車駕親幸  
執手流涕太子問疾者三往還皆拜儒者以爲榮  
太興二年卒

論曰元帝初鎮建康居月餘士庶莫有至者會王  
敦來朝導謂之曰兄威風已振宜有以匡濟之三  
月上巳帝親觀禊吳人顧榮紀瞻見帝拜於道左  
導因進計勸帝賓禮數于以收南土之望敦反劉  
隗勸帝盡誅王氏向非導之公忠亮節有以深信

上元縣志

卷十六

邑獻

十七

於帝導族無噍類矣謝安矯情鎮物於傳稱之然  
淝水之捷玄實有力亦安之知人善任然也賀循  
中興倚重顏含發棺活兄躬親飲哺悌弟所難王  
諒謀誅梁碩不克臂斷身死烈矣哉

謝弘微太保安之族孫出繼從叔峻幼時精神端審  
時然後言叔父混名知人見而異之曰此兒深中  
夙敏方成佳器有子如此足矣義熙初襲峻爵建  
昌縣侯唯受書數千卷國吏數人遺財祿秩一不  
關預八年混以劉毅黨獲罪妻晉陵公主詔與謝  
氏離絕公主以家事委之弘微經紀生業事若在

公一錢尺帛出入皆有文簿遷通直郎宋高祖既  
卽位以混得罪前代東鄉君節義可嘉聽還謝氏  
自混亡至是九載而室宇修整倉庫充盈門徒僕  
使不異平日田疇墾闢有加於舊東鄉君歎曰僕  
射平生重此子可謂知人僕射爲不亡矣累官尚  
書吏部郎叅預機密尋加侍中每有獻替及論時  
事必手書焚草人莫之知九年東鄉君薨資財鉅  
萬弘微一無所取自以私祿營葬混女夫殷獻素  
好樗蒲聞弘微不取財物乃濫奪以還戲債內人  
皆化弘微之讓一無所爭十年卒

上元縣志

卷十六

邑獻

十八

謝靈運玄之孫少好學博覽羣書文章之美爲江左  
第一襲封康樂公出爲永嘉太守

謝莊字希逸弘微子七歲能屬文宋文帝見而異之  
時南平王獻赤鸚鵡普詔羣臣爲賦袁淑文冠當  
時作賦畢示莊及見莊賦嘆曰江東無我卿當獨  
秀我若無卿亦一時之傑也遂隱其賦

謝朓字敬冲弘微孫幼聰慧十餘歲能屬文父莊遊  
土山賦詩使朓命篇朓攬筆便就莊撫其背曰眞  
吾家千金宋孝武遊姑孰勅莊携朓從使爲洞井  
贊於坐奏之孝武曰竒童也蕭道成輔政選朓爲

長史勅與褚炫江敷劉俟俱入侍號爲天子四友  
道成方圖禪代思佐命之臣以肫有重名深所欽  
屬論魏晉故事言石苞不早勸晉文死方慟哭方  
之馮異非知機也肫答曰晉文世事魏氏將必終  
身北面假使魏早依唐虞故事亦當三讓彌高道  
成不悅及齊受禪肫爲侍中當曰在直百僚陪位  
侍中當解璽肫佯不知曰有何公事傳詔云解璽  
受齊王肫曰齊自應有侍中乃引枕卧傳詔懼乃  
使稱疾肫曰我無疾何所辭遂朝服步出東掖門  
乃得車還宅是日遂以王儉爲侍中解璽旣而太

上元縣志

卷十六

邑獻

十九

子頤言於高帝請誅肫高帝曰殺之則遂成其名  
正應容之度外耳遂廢於家後復出居郡建武四  
年徵爲侍中中書令抗表不應召梁武踐祚徵之  
亦不屈明年六月輕舟出詣闕自陳旣至詔以爲  
侍中司徒尚書令肫辭足疾不堪拜謁乃角巾肩  
輿詣雲龍門謝詔見於華林園明旦武帝幸肫宅  
醺語盡歡肫固陳本志不許因請自還迎母乃許  
之臨發復臨幸賦詩餞別士人迎送相望於道建  
康勅材官起府於舊宅武帝臨軒遣謁者於府拜  
授焉

謝瀹字義潔肫之弟少簡靜有韻度王彧見而異之言於宋孝武孝武召見於稠人廣衆中舉動閑詳應對合旨孝武甚悅爲吳興太守有美績後爲吏部尚書蕭鸞廢鬱林領兵入殿左右驚走報瀹瀹與客圍棋畢局乃還齋卧不問外事鸞又廢海陵自立瀹遂屬疾不視事後燕會功臣尚書令王晏等與席瀹獨不起曰陛下受命應天從民王晏妄叨天功以爲己力明帝大笑解之

謝眺字元暉少好學有美名文章清麗善草隸長五言詩沈約常云二百年來無此詩也眺好獎人才

上元縣志

卷十六

邑獻

二十

會稽孔閎粗有才華未爲時知孔珪嘗令草讓表以示眺眺嗟吟良久手自折簡寫之謂珪曰士子聲名未立應共獎成無惜齒牙餘論其好善如此謝惠連方明子靈運族弟也幼有奇才十歲能屬文不爲父方明所知靈運去官還會稽時方明爲守靈運造焉遇惠連大相稱賞靈運性無所推重獨重惠連每有篇章對之輒得佳語嘗於永嘉西堂思詩竟日不就忽夢見惠連卽得池塘生春草句大以爲工常云此語有神助

論曰世稱王謝子弟尚矣然導之族孽牙王敦其

濫觴也謝自安石著望東山族孫弘微經紀晉陵家事尺寸無私靈運襲封康樂公永嘉太守惠連靈運族弟對之輒得佳句莊江東獨秀拙仕宋爲長史與褚江劉入侍號天子四友眺工五言詩尤喜獎進後學瀟當廢鬱林時屬疾不視事盖亦幾於正云

王邵字敬倫導第五子美姿容有風操雖家人近習未嘗見其情替之容官至吏部尚書僕射出爲吳國內史弟薈字敬文亦爲吳國內史值年饑粟貴薈以私米作餲粥以飼餓者所濟活甚衆

上元縣志

卷十六

邑獻

二十一

王珣字元琳導次子中書令洽之子爲桓温掾軍中機務悉委珣文武數萬人悉識其面從討袁真封東亭侯歷吳國內史士庶悅服徵爲僕射領吏部後進衛將軍都督琅邪水陸軍事以疾解職弟珉字季琰少有才藝名出珣右代王獻之爲中書令世謂獻之大令琰小令卒年二十八

王舒字處明導從弟荊州刺史玉敦敗王含父子俱奔舒舒逆而沉之於江蘇峻反舒與庾冰等起義兵討峻會陶侃至京都立行臺舒監浙江東五郡軍事舒子允之督護吳郡義興晉陵三郡征討軍

事峻平以功封舒彭澤侯卒謚穆允之字深猷總  
角時從伯敦謂爲似已偕食寢敦與錢鳳謀爲逆  
允之聞其言白舒啟明帝敦平帝欲允之仕舒辭  
隨之會稽任及討蘇峻封番禹縣侯咸康中刺江  
州有惠政卒謚忠

王彪之字叔武尚書僕射虞之子除著作佐郎歷遷  
侍中廷尉言郊祀必赦恐凶愚生心僥倖從之轉  
吏部尚書郎遷轉不阿出爲會稽內史居郡八年  
豪右斂跡流亡盡復海西廢時彪之神彩毅然文  
武儀準莫不取定朝廷服之簡文崩羣臣未敢立

上元縣志

卷十六

邑獻

二十一

嗣或云宜當須大司馬處分彪之正色曰君崩太  
子代立大司馬何容得異孝武帝卽位遷尚書令  
與謝安並掌朝政大事必從彪之諮議而定卒謚  
簡

王述字懷祖父承從元帝渡江司徒王導以門第辟  
述中兵屬嘗見導每發言一座莫不贊美述正色  
曰人非堯舜何能每事盡善導改容謝之歷庾冰  
征虜長史冰欲移鎮樂鄉述止之尋遷衛將軍尚  
書令桓温平洛陽議欲遷都朝廷憂懼述曰温以  
虛聲威朝廷耳但從之自無所應果不行又議欲

遷鐘篋述曰方當蕩平區宇旋軫舊京若其不爾  
宜改遷園陵不應先事鐘篋温無以奪以老乞歸  
卒謚簡

王坦之字文度述子也襲父爵領左衛將軍非時俗  
放蕩著廢莊論以敦儒術尋領本州大中正簡文  
帝詔桓温依周公居攝故事坦之持詔入帝前毀  
之乃使坦之改詔俄領丹陽尹徐兗二州刺史鎮  
廣陵上表言人君以孝敬爲本以委任爲貴又諫  
謝安好聲律晷功不廢絲竹之非卒年四十六臨  
終與謝安桓冲書惟憂國家之計謚曰獻

上元縣志

卷十六

邑獻

二十二

論曰江左子弟以王氏爲首導六子皆襲父爵恬  
尤以子珣濟美盛矣處明導從弟沉王含於江深  
猷隨父之會稽護吳興軍事懷祖性沉靜導以門  
第辟中兵屬桓温爲其子求婚文度辭以他故温  
曰此尊君不肯耳叔武風規嚴整惟温廢海西時  
取霍光傳以定其事世論少之然要之皆不離於  
正近是

**南北朝**王曇首太保弘少弟幼有操尚宋文帝鎮江  
陵時曇首爲鎮西長史高祖甚知之謂文帝曰王  
曇首沈毅有器度宰相才也汝每事咨之及帝入

奉大統議者皆疑不敢下星首與到彥之固勸并  
言天人符應乃率府州文武嚴兵自衛及卽位謂  
曇首曰非宋昌獨見無以致此以爲侍中尋領右  
軍將軍徐羨之謝晦等 曇首與有力焉文帝欲  
封之詔已成固讓不受七年卒文帝爲之慟追贈  
左光祿大夫

王僧綽曇首子幼有大成之度衆以國器許之宋元  
嘉中徙尚書吏部郎叅掌大選究識流品詣悉人  
物拔才舉能咸得其分二十八年遷侍中任以機  
密僧綽沈深有局度不以才能高人文帝末年頗

上元縣志

卷十六

邑獻

二十四

以後事爲念以其年少方欲大相付託朝政大小  
皆與叅焉會巫蠱事泄文帝召僧綽具言之及將  
廢立使尋求前朝舊典劭于東宮夜饗將士僧綽  
密以啓聞文帝又令選漢魏以來廢諸王故事謂  
僧綽曰諸人各爲身計便無與國家同憂者僧綽  
曰建立之事仰由聖懷臣謂唯宜速斷不可稽緩  
願以義割恩畧小不忍不爾便應坦懷如初無煩  
疑論及劭弑逆轉爲吏部尚書委以事任頃之邵  
料檢巾箱及江湛家書疏得僧綽所啓饗士并廢  
諸王事乃牧害焉時年三十一

王僧虔僧綽弟世爲宰相昆仲有時名太保弘每與兄弟集會任諸子孫相戲僧達下地跳作虎子僧虔年數歲獨正坐採蠟燭珠爲鳳凰弘曰此兒終當爲長者弱冠善隸書宋文帝見其書素扇歎曰非唯迹踰子敬方當器雅過之兄僧綽爲元凶所害親賔咸勸僧虔逃僧虔涕泣曰吾兄奉國以忠貞撫我以慈愛今日之事苦不見及耳若同歸九泉猶羽化也出爲武陵太守兄子儉於中途得病僧虔爲廢寢食客慰諭之僧虔曰昔馬援處兒姪之間一情不異鄧攸於子弟更逾所生吾實懷其

上元縣志

卷十六

邑獻

二十五

心誠未異古亡兄之亂不宜忽諸若此兒不救便當回舟謝職無復遊宦之興矣累官尚書令齊高帝革命遷持節都督湘州諸軍征南將軍湘州刺史侍中如故清簡無欲不營財產百姓安之兄子儉爲朝宰起長梁齋制度少過僧虔視之不悅竟不入戶儉卽毀之永明三年卒

王儉字仲寶僧綽子幼有神彩專心篤學手不釋卷齊高帝爲太尉引爲右長史恩禮隆密專見任有時大典將行儉爲佐命禮儀詔策皆出其手齊臺建遷右僕射領吏部時年二十八制度草創儉識

舊事問無不答高帝歎曰天爲我生儉也永明二年領丹陽尹三年領國子祭酒四年兼領吏部儉長禮學諳究朝儀每博議引證先儒罕有其例令史諮事賓客滿席儉應接銓序旁無留滯十一日還學監試諸生巾卷在庭劔衛令史儀容甚盛作解散髻斜插幘簪朝野慕之日與倣效儉常謂人曰江左風流宰相唯謝安耳盖自比也武帝深委任之士流選用奏無不可儉屢啓求改選不許七年卒

王志字次道僧虔子九歲居生母憂哀容毀瘠爲中

上元縣志

卷十六

邑獻

二十六

表所異爲宣城內史清謹有恩惠郡民張倪吳慶爭田經年不決父老乃相謂曰王府君有德政吾曹鄉里乃有此爭倪因相携請罪所訟地遂爲閒田復爲東陽太守獄有重囚十餘人悉遣還家過節皆返惟一人失期獄司以爲言志曰此自太守事主者勿憂明旦果自詣獄辭以婦孕吏民益嘆服之轉吏部尚書梁武入京百僚署名送東昏首志聞而嘆曰冠雖敝可加履乎因取庭中樹葉授服之僞悶不署名武帝覽牋無志名心嘉之弗以讓也未幾除丹陽尹爲政清靜去煩苛建康有寡

婦無子姑亡舉債以葬既而無以還之志愍其義以俸錢償焉時年饑每旦爲粥於郡門以賦百姓家世居建康禁中里馬糞巷父僧虔以來門風多寬恕志尤惇厚兄弟子姪皆篤實謙和時人號爲馬糞諸王爲長者

王筠字元禮僧虔孫也七歲能屬文年十六爲芍藥賦甚美及長清靜好學尚書令沈約每見其文輒咨嗟吟咏以爲不逮謂筠曰昔蔡伯喈見王仲宣稱曰此王公孫也吾家書籍悉當相與僕雖不敏請附斯言又嘗啟梁武帝言曰晚來名家惟見王

上元縣志

卷十六

邑獻

二十七

筠獨步昭明太子愛文學士嘗與筠及劉孝綽陸倕到洽殷芸等遊元圃太子獨執筠袖撫孝綽肩而言曰所謂左把浮丘袖右拍洪崖肩其見重如此官中書郎奉勅撰中書表奏三十卷及所上賦頌爲一集沈約云自開闢以來未有爵位蟬聯文才相繼如王氏之盛者也

論曰曩首仕宋有佐命功僧綽尚書吏部郎會劭夜饗士謀逆綽密啟以聞卒以此被害綽弟虔出爲武陵太守綽子儉於中途得病僧虔憂廢寢食儉事齊高帝專見任嘗謂人曰江左風流宰相

惟謝安耳盖自況也王志任丹陽尹清靜不煩苛筠七歲能屬文累官中書郎沈約云開闢來爵位蟬聯文才相繼惟王氏極盛良然

宋王綸字德言建康人登紹興五年進士授平江府崑山主簿歷鎮江婺州臨安教授權國子正時建太學亡舊規憑吏省記吏緣爲奸綸建釐正之弊稍革遷勅令所刪定官諸王宮大小學教授兼權兵部郎官言孔門弟子與後世諸儒有功斯文者皆得從祀先聖今闕庠序修禮樂宜以其式頒諸郡縣二十四年以御史中丞魏師遜薦爲監察御

上元縣志

卷十六

邑獻

二十八

史與秦檜論事忤其意師遜劾綸踰年知興國軍檜死召爲起居舍人兼權禮部侍郎二十六年試中書舍人高宗親政召諸賢於散地詔命填委多綸所草奏守臣裕民事乞母拘五條從之兼侍講二十八年除同知樞密院事金將渝盟綸率同僚白其事乞備禦二十九年六月朝論欲遣大臣爲信使覘敵且堅盟好以綸爲稱謝使至金館禮甚隆還朝疾作方丐外除資政殿大學士知福州上解所御犀帶賜之明年知建康府兼行宮留守三十一年八月卒謚章敏

胡銓字邦衡其先金陵人後避地居廬陵因家焉建  
二年高宗策士維揚擢第一有娼其進者降第  
五授文林郎累遷編修官七年秦檜決策與金人  
講和王倫誘致金使以詔論江南爲名銓上書乞  
斬檜倫與孫近三人羈留鹵使興兵伐之書奏除  
名謫新州檜死量移孝宗卽位首復官歷端明殿  
學士卒年七十九命其子口授遺表有死爲厲鬼  
殺賊之語表聞贈通議大夫謚忠簡

論曰宋以科舉取士而時之元惡大憝如王安石  
秦檜輩非科舉中人乎然有一小人作奸於上卽  
有衆君子起而爭之惡之如德言之論事忤檜意  
邦衡之請斬檜倫與孫近三人雖事未克濟而光  
明正大之氣固已嶽嶽宇宙間矣又况如司馬諸  
大賢其人哉明之好亦然而科舉卒不能滅者倘  
亦聖賢之澤乃爾耶

**明**徐承宗中山王曾孫襲爵魏國公英宗時守備南  
京號令嚴肅宗族家衆罔敢撓法居十六年人未  
嘗見其坐立傾倚喜怒橫發時以爲有大臣體

王麟上元人宣德己酉鄉貢授儀真教諭轉國子監  
學正擢四川按察僉事督學政隨改山東政聲稱

最天順初進階奉議大夫杜門不出卒年八十有三

顧儼字廷望家金陵正統中以經明行修薦任嘉興訓導登甲科授陝西道御史清理福建軍政沙汀民叛領兵抵其境擒首惡餘黨悉平陞廣東僉事新會陽江有賊數萬提兵直擣其巢斬獲無算總戎上其功賜銀幣以勞疾乞歸

倪謙字克讓上元人正統四年進士第三人奉使朝鮮丰采凜然卽席揮毫畧不經意至今國人梓行其文天順初屢遷學士簡侍東官己卯主試順天

上元縣志

卷十六

邑獻

三十

黜權憲之子誣構謫戍開平成化初復舊職與子岳同日奉命入史館纂修英宗實錄進禮部侍郎轉南禮部尚書乞致仕卒贈太子少保謚文僖謙德量寬洪誠信無僞嗜學不倦立朝多所建明子岳阜各有傳

倪岳字舜咨尚書謙子天順甲申進士授編修成弘間歷遷禮部侍郎定徽號冠婚祧袷及奉慈殿禮文制度晉尚書疏請開言路寬賦役慎刑罰革淫祠禁齋醮止胡僧却貢獅經術醇正議論詳明轉吏部尚書獎恬抑躁銓叙惟允卒謚文敏

阜字東岡岳之弟成化丁未進士選庶吉士授都司主事陞郎中轉山東分守叅政時郡邑多盜阜計擒首惡餘黨悉降改守東兗檄遣勘地竭力區畫民賴以安陞四川布政卒

論曰徐承宗中山王曾孫襲爵坐立不倚喜怒平中得家法矣王麟顧儼並起家儒官洵歷大任治行卓然倪文僖以進士第三人仕至南京禮部尚書嘗奉使祀北獄夫人姚夢緋袍神入室生岳因以爲名岳瓌偉秀異目先炯炯望之如神天順元年入翰林歷侍讀至學士留心世務貫通經史一

上元縣志

卷十六

邑獻

三十一

切儀文舊典軍國重計多所裁定卒贈少保謚文毅岳弟阜盖亦白眉濟美者倪氏之盛父子並得謚文可不謂邦家之光哉

顧璘字華玉弘治丙辰進士初令廣平融朗濶達精於吏理及守開封鎮守中官廖堂乃逆瑾黨予奪自恣璘每加摧抑不令得肆瑾誅廖罷去而錢寧用事王宏繼鎮尤悖慢氣焰襲人璘忤之矯詔逮錦衣獄吏問狀璘據理執誼抗言條對宏遣邏卒陰探郡中無所得乃文致他事以竟其獄獄成徙知全州及起撫湖南益事振植輶車省循徧歷州

郡民按堵不知爲勞所至勸農振業平徭復稅而  
擿伏省微民用安集首言地瘠民貧兵食不足而  
藩府賦祿無限後繼爲難又以湖湘控扼邊徼地  
大事繁乞添差御史分洩河南北以廣詢謀所言  
凡數十事皆當時利病深切治理陞刑部右侍郎  
尋改吏部會顯陵肇工改工部左領山陵事璘既  
長於料簡而程省費鮮調發有制進尚書改南刑  
部卒年七十璘子嶼字懋涵少年文譽騰踴詩賦  
援筆立就以歲貢卒孫應祥亦以詩名

顧璘字英玉上元人璘弟正德甲戌進士歷官河南

上元縣志

卷十六

邑獻

三十一

副使與部使者論事有不可輒封還移文同官駭  
愕璘曰朝廷置外臺爲耳目枉法媚人吾不爲也  
竟以是罷匾其樓曰寒松教授自給

李重字遠菴金吾後衛人正德辛未進士授戶部主  
事時芻粟皆中官預之重以清苦自持中官餽遺  
悉拒卻爲時所重明年督賦兩浙鎮守太監劉璟  
侵官銀至二十萬欲厚餽以鉗其口重正色曰與  
其遣我孰若爲民償所負以足國乎璟憚其嚴盡  
以所侵輸官由是兩浙宿負完百三十餘萬歷員  
外郎擢德安府會有告宗藩群校豪橫不法事悉

實如法以是構讐至遣廷臣鞫之事始白謫官歸  
民哭送之戊子漕河壅用大臣薦起工部郎中擢  
守九江進江西按察副使持法不能俯仰與上官  
不協罷歸子神嘉靖丙午舉人

景暘字伯時舉正德戊辰進士第三人除翰林編修  
時逆瑾亂政陵轍朝士見者屏氣暘獨弗阿每當  
進講必越宿齋沐覲有感悟在館職九年遷國子  
司業三年改左中允管南京國子司業事南方士  
習競尚便利有請囑者一切謝絕辛巳以母憂去  
位甲申起復方就道染疾旬日而卒暘清介過甚

上元縣志

卷十六

邑獻

三十二

居官如布衣時坦白溫直尤篤孝義初母目盲百  
計莫療暘旦夕禱於神一日雙眸炯然有姊早寡  
奉與母居爲嫁娶其子女友人張貢見暘女欲與  
婚未聘也貢卒暘召其子妻之卒年四十九  
王以旂字士招正德辛未進士授江西上高知縣時  
華林賊方熾數剽掠縣境而流賊復往來江上上  
高爲賊衝以旂團結鄉兵聲言欲搗穴賊不敢犯  
入爲監察御史巡按河南會宸濠叛鎮守闍劉璟  
與通謀倡言上親征道出汴取藏銀四萬兩備供  
應諸司莫可誰何以旂徐譬曉之嘉靖時巡按福

建賊劫安溪永春延及尤溪以旂度且犯福寧檄  
兵備禦賊謀大沮尋以親老乞養家居十餘年父  
卒服闋起歷官兵部右侍郎是歲徐呂洪渴漕舟  
滯不行遣以旂督治至則先求故道視泉脉循經  
流塞分殺自徐洪南抵沽頭增置閘又相地形引  
水塹築土壩河流時滙漕舸皆如期達京師汶上  
寧陽之間有水櫃四勢豪侵沒詭獻德邸藉灌溉  
爲私利以旂上言水櫃以備蓄洩河溢則懸河以  
入湖河澀則懸湖以入河遂任怨力復之至今賴  
焉事竣擢掌南臺以風憲重臣居梓里舊宅在聚  
寶門外每歲時歸祀必由他道謂諸子曰昔張湛  
入里門必步此可取爲法也召入爲工部尚書尋  
改兵部代曾銑督陝西務爲鎮靜邊境以寧疾作  
乞致仕卒於固原鎮邊民號泣罷市賜葬祭謚襄  
敏

劉璽字廷守龍驤衛人正德間擢江西都司巡撫盛  
公應期知其廉明每屬以疑獄多所平反璽乃請  
依期給糧以卹軍士清宿弊以杜奸宄革吏民入  
司之公罰除衛所冊文之扛解移廢府之餘財以  
立官署出城濠之租稅以歸入府善政美意不一

而足王文成總制江西一見重之巡按穆公相疏  
薦有僚友比之學官家人謂之窮鬼等語及推總  
漕運上識其名喜曰是前窮鬼耶亟可其奏璽奏  
增餘丁月糧以均勞逸定考課以裨軍政明漕規  
以一衆心疏濬江南河道以濟糧運折兌山縣糧  
米以免稽遲凡三十餘疏垂爲漕政良規郭勛方  
有寵屬市南物於運舟分載入都璽不應以疾請  
告久之復召竟以直忤當道罷歸

趙俊號雪岩弘治癸丑進士任河南道監察御史巡  
江巡倉法不稍徇薦林俊楊一清才堪大用時太

上元縣志

卷十六

邑獻

三十五

監汪直以罪置孝陵奏請司茂陵香火圖復進俊  
力疏其奸時論壯之正德初劉瑾當國致仕歸閉  
戶讀書訓飭諸子弟以終

陳沂字魯南鋼之子登正德丁丑進士選庶吉士除  
編修與修武宗實錄甲申與鄒守益楊慎等再論  
大禮乙酉實錄成進侍講每經筵進說必委曲寓  
規諷意世廟問宰孰知其名尋忤永嘉出爲江西  
叅議督賦諸郡民皆稱便進山東左叅政嘗按鉅  
野有群盜謀劫縣沂偵知之調兵掩捕盜驚散尋  
改山西行太僕卿疏乞歸築遂初齋杜門著述絕

意人事詩文高古晚益臻理奧時大江南北稱朱  
顧陳王四大家山東通志南畿志皆其筆削子時  
萬嘉靖甲午舉人

鄭瓏驍騎右衛人弘治己未進士令新喻居官廉正  
陞刑部主事守高州改南昌時宸濠蓄異志招巨  
盜潛劫江 捕之濠誣奏捶殺王府校尉購錢  
寧矯詔撫按提問濠反因械繫之于小船忽風吹  
船開遇鄰船釋其縛奪馬潰圍登岬一呼從者千  
人斬賊將范成等赴王新建軍門備陳賊勢烏合  
易敗請速進兵陽明授以兵四百使巡守俘賊賊

上元縣志

卷十六

邑獻

三十六

平復任以訐直忤當道又爲楊材所誣侍郎吳廷  
舉等不平疏辨之上知瓏忠直擢山東鹽運使子  
守矩嘉靖壬子舉人令邵陽廉明仁恕卒年八十  
三

張琮字廷獻弘治庚戌進士任禮部儀制郎中孝宗  
不豫免長至賀東宮親王如故事公請於尚書曰  
未有天子不豫而王受賀者太子侍膳問安禮亦  
宜省已而命下如所議占城國王請封舊制册封  
夷王以給事中一人占城在海外人憚於往六科  
屢上議止之疏尚書不能決公曰封而告不以封

天子之命討廢矣禮先告哀而後請封國無訃命將誰與以是詰之威信其庶幾乎卒從公言晉藩有奪王封者逆瑾受賂勢凌有司公獨執不可吏部出公陝西叅議謫濟寧知州尋改監察御史巡按甘肅時真鐮甫平餘亂未息公卹無辜而真渠魁以法邊民以安瑾誅進按察副使兵備勛襄有妖人僞爲符璽聚數千人作亂郡邑請兵公曰此特縛其魁耳召勇士數人抵其巢獲之且諭衆曰茲謀非汝等所知法不及汝衆駭散遂定屢陞南工部右侍郎改刑部進右都御史四疏乞休命有

上元縣志

卷十六

邑獻

三十七

司歲供夫役月繼廩粟以優老卒賜葬祭子恕嘉靖戊子舉人官至僉事志教授哲通判皆以賢世其家

鄭濂字師周嘉靖癸未進士爲行人兩使藩封餽贖一無所受選授山東道御史按兩浙粵西有能名出爲湖廣按察使以父憂乞致仕歸養母盡孝設榻母側旦夕候問起居惟謹長跽進甘旨母卒濂已及耄哀毀踰禮里人著純孝傳以稱之待二弟無間言屏跡公門年八十餘卒

論曰宋賢上封事人主親宦官官妾之時多則親

賢士大夫之時少豈其故爲是語哉君子小人之  
進退否泰之由分也宦官無日不中傷君子君子  
無日不痛拒宦官江左人士以顧華玉爲首迹其  
抑中官廖堂忤瑾黨逮錦衣獄章章矣伯時廷獻  
之不阿事瑾王士招李遠菴能用瑾不爲瑾用趙  
雪岩阻汪直改司茂陵香火鄭璫忤宸濠購錢寧  
矯詔提問其得免於禍者幾希魯南侍講多所規  
諷鄭師周不受藩封餽顧英玉任外臺不媚人  
孰非守道自衛者耶然而終明之世宦寺之禍盖  
踵相接也

上元縣志

卷十六

邑獻

三十八

顧國輔字惟德金吾衛籍祖以幼孤鞠於張遂蒙其  
姓登萬歷甲戌進士由刑部郎中出守襄陽晉浙  
憲副使請復姓性孝友奉親色養備至伯有子弗  
能養暨張氏子貧並優贍之終其身居刑曹清慎  
時當讞囚有所矜釋江陵不允乃抱牘而質於江  
陵江陵無以奪始入襄屬允旱首倡便宜賑濟大  
雨如澍歲尋五稔中州流民就食者數萬多方活  
之且資遣歸鄖卒叛詈制府毆監司襄卒聞亦思  
逞國輔召將士諭以大義皆屏伏任浙憲治兵海  
上繩諸將之耄而貪者薦其才而勇者署考郡邑

吏旌賢汰否務核實才會爲忌者所中調守寶慶  
數月卒於任伯子起元別有傳起鳳庚戌進士南  
鴻臚卿起貞辛酉舉人戶部郎

顧起元字鄰初萬歷戊戌會試第一人殿試一甲第  
三人由編修累官吏部左侍郎時座主沈蛟門葉  
臺山秉政屢欲引以大拜公避居遯園七徵不起  
立朝僅五載耳門人有巡鹺兩淮者知公清素乃  
密諭鹽商以重貲求其寸札公堅卻曰吾不爲也  
公學問淵博知古今成敗人物臧否以至諸司掌  
故指畫歷然可據凡考訂成憲者皆折衷於公焉

上元縣志

卷十六

邑獻

三十九

稱述先輩接引後學孜孜不倦林泉自賞未嘗輕  
至公庭惟地方利弊如兵部快船改馬船絕衛官  
之科索兩縣坊廂準里甲爲條編皆更定良法軍  
民兩便或有妄言復舊以便其私者公力爭之乃  
止人猶惜其不及大用云著說畧遯園集雪堂隨  
筆客座贅語寒松齋稿歸鴻館稿武陵稿卒謚文  
莊子道昆以廕叙戶部檢校

李逢暘字維明金吾後衛籍爲諸生時大京兆喻時  
延以教子逢暘以師道自重出入未嘗左顧見者  
肅然戊午舉孝廉京兆實薦之逢暘弗善也絕不

謁謝喻亦不介意時 兩賢之 至孝母沒哀毀  
骨立啖疏處外三年悉如禮隆慶戊辰成進士選  
庶吉士避弗就乃授戶部主事改儀部郎奉命遣  
祭楚王事竣卻其贖卒年僅四十素性篤於踐履  
不事空談嘗語所善者曰學校風俗所關須厚自  
待世間兒曹熊不足慕倣也吳司寇合楊道南稿  
傳之

何光顯字丕承應天府庠生少以名節自負南京建  
魏闈祠光顯自捐資擇地上闈祠數武起海忠介  
祠同日肇工一榔一斧務令聲相聞曰媿彼爲國

上元縣志

卷十六

邑獻

四十

家存一綫也天啓二年以御史誤責文時光顯大  
譁朝旨欲罪之逆黨游鳳翔竄入光顯名遂罹於  
獄擬戍未決會闈誅崇禎改元釋歸後上書請誅  
馬阮中其毒以計殺之  
論曰顧惟德祖鞠于張雖通籍至大官復姓而終  
身瞻張之子厚矣宜其子文莊之爲一代偉人也  
李維明力學篤於踐履不事空談任禮部儀制主  
事奉使祀楚王不受贖何丕承應天府庠生以名  
節自負卒死馬阮之手語曰鄉先生歿而祭于社  
者其在斯人與

余光嘉靖進士擢御史巡按廣東時世宗以安南莫登庸久不貢將致討光上疏極諫言黎民抗中國爲亂魁今失國或天假手登庸以報之也臣已遣官責其修貢兵部咎光輕率奪俸又以忤嚴嵩削籍少子孟麟

余孟麟字伯祥別號幼峯性純孝績學能文藻韻自然不猶寒素萬歷二年甲戌廷對賜及第第二人授編修充纂修會典母黃孺人侍御繼室侍御沒時幼峯尚髫齡未自立孺人慘戚力支身督內傳訓幼峯學以是有成八年春孺人病幼峯乞假歸

上元縣志

卷十六

邑獻

四十一

省逾年卒得視含斂盖孝感所致也服除起原官歷仕至南大司成一子太學生震鳴讀書足世其家學無何與婦許氏相次歿幼峯耄年抱痛冀得一早致仕以爲儒臣進退之榮顧累疏乞休不得會中忌者口章下始允迨歸里以著作輝映林泉悠遊燕喜年八十三乃卒公纘前業爲名鼎甲位極人師聲望二十年如一日可謂完福顧幼無父老無子居瑩民之二豈天之數又未盡憑耶立孫是爲集生

余大成字集生祭酒孟麟外孫也立以爲嗣生有夙

慧困童子試者十餘載萬歷丙午丁未聯捷授南  
京兵部主武選典壬子滇試稱得士歷職方以忤  
璫削籍崇禎初特旨加尚寶卿仍任職方加太僕  
卿綜理邊務具有條畫值京師戒嚴大司馬被逮  
大成獨力任事中使宣傳相繼不脫冠帶者百餘  
日事平回太僕前後二十餘載四任職方御批清  
執二字褒之陞山東巡撫值登變與防撫孫元化  
并逮廷臣白其冤謫電白後以追叙甘肅功除伍  
歸籍次子二聞知襄城縣著廉名

焦竑字弱侯旗手衛籍父文傑衛千戶生平伉直不

上元縣志

卷十六

邑獻

四十一

欺振武營兵變羣起攫賞文傑按劔戢所部無敢  
譁還吳主簿所寄八百金仍護歸其喪人稱盛德  
竑生而端敏六歲時從師登觀象臺嘆曰天濶如  
此人乃蔽以垣撤之則六合爲一矣稍長好學博  
覽耿天臺先生視學南畿深加延接最爲高弟適  
盱江羅公來自宛陵天臺弟子庸至自楚而許敬  
菴管東溟諸賢畢會互相印可執業請益者踵至  
萬歷己丑殿試第一人除修撰南京陳文憲公疏  
修國史意崑屬竑竑爲具凡例體裁又爲經籍志  
兼輯諸名臣家乘稗記爲獻徵錄雖正史未竟修

而一代鉅典犁然略具爲東宮講官故事進講者多依經講義竝講畢拱揖而進曰臣等敷陳或有未備願殿下垂賜明問自是每講必從容叩擊睿質加益咸服竝之善導時太倉以元子冲齡典學當引以圖史故事竝遂采輯成書繪圖演義名曰養正圖解具疏上之上詳加省覽溫語批答同列忌之丁西北試上寘原推兩宮坊而用竝忌者益甚摘士牘一二奇語以爲壞文體調外竝歸怡然自得杜門著書東南學者仰若山斗其學惟以性命名理爲極而濟時御變咸中窾要丁酉三殿災

上元縣志

卷十六

邑獻

四十二

甚竝走京營帥臨淮侯所令集營軍以救侯以無旨難之竝曰請旨與調軍並發可也得旨而軍已集及倭入朝鮮中外爭言戰欵竝曰倭不習中國閩浙人導之耳燕人不習倭也何導之從無張皇搖人心居一年倭遁去楚宗人戕殺撫臣誅譴徵調無寧日竝曰此尺一可解耳已而果定他如南中襲替請南司馬以黃底審覈得免赴京之苦江南浦口要害語守臣修築堅城以固藩衛句曲將開河直達白下竝謂都城龍脉所關不當輕開事乃止其決機成務皆此類所著述甚富正續集筆

乘類林刊行其藏於家者尤多

焦潤生字茂慈文端公之長子十歲能詩由國子生  
筮仕詹事主簿歷陞戶部主事督餉寧遠爲總制  
洪承疇所器重薦授雲南曲靖府知府署任兵備  
道值獻賊蜂起浸至於貴陽城僅標兵百人公力  
禦不支北面再拜痛哭死之滇民至今祠焉

論曰予撰金陵人物於余侍御焦太史兩家世系  
深致意焉侍御光巡按廣東諫伐黎莫登庸而遣  
官責以修貢可謂得治體矣乃以是奪俸何也嵩  
使然也伯祥爲侍御少子黃孺人教之成立萬歷

上元縣志

卷十六

邑獻

四十四

二年廷對賜一甲第二人充纂修會典官仕至南  
大司成一子震鳴早卒大成以外孫入繼四任職  
方以清執見重於時侍御可謂有孫矣焦大史竝  
生百端敏稍長博學好覽耿天臺視學南畿深加  
延接己丑殿試第一人進講東宮上養正圖解爲  
用事忌歸來東南學者仰若由斗潤生其長子知  
雲南曲靖府以禦獻賊殉國死仲子尊生舉人說  
者謂太史父文傑盛德所致一謂所居宅清溪之  
辛水環焉盖並存之云

國朝

劉思敬字純之號覺岸甫十歲能文大中丞余公

集生一見卽期其遠到遊府庠司成項公水心督  
學金公楚畹咸器重之己卯以五經貢副車貢北  
雍不仕丙戌鄉薦丁亥成進士任刑部郎凡七年  
恤獄慎刑間以執法忤要路幾蹈不測然亦無悔  
乙未分校禮闈所得士王日藻劉芳鐸史逸裘黃  
虞再等三十八人皆知名尋擢左江道叅議以母  
踰八旬乞終養從容林泉著書論道無虛日癸亥  
應制府于公聘纂修江南省志著徹牘八編太守  
于公舉鄉飲大賔學者至今稱劉先生

劉思問字晰之由選貢中壬午舉人癸未壬辰會副

上元縣志

卷十六

邑獻

四十五

任顛榆教諭陞廉州彰德司李民無冤滯署肇慶  
府篆時歲大旱思問甫至甘霖隨禱而應遷江西  
瑞陽司馬歷官清正教化大行歸里後士民咸謳  
思之

白夢鼎字孟新與胞弟夢鼐齊名孟新未弱冠值流  
寇戒嚴卽以奇策爲舊京丁操江所識友善周仲  
馭黃石齋兩先生觸忤閹黨權貴擬中傷會改元  
崇禎得免及福藩南渡黨禍復熾捕孟新於南大  
理刑部孟新抗言質對作存貞錄

國朝定鼎獄始解晚年著述日富太守陳開虞聘脩府

志制府于清端公聘脩江南通志壽八十長子采  
邑庠生有文名

白夢鼐字仲調其先隴西人五世祖貴峰來金陵遂  
家焉生而穎異爲諸生時與兄孟新齊名隱然有  
公輔望懷宗誅魏闖伏莽有未除者公爲持正論  
於是僉壬側目思中傷之捕付詔獄值

國朝定鼎乃獲免旋舉明經入北雍登辛卯賢書庚戌  
以第二人成進士筮仕大理寺評事頃以明史未  
就

詔舉博學魏總憲環溪特疏薦公不果用庚申典試入

上元縣志

卷十六

邑獻

四十六

閩榜發後衆論快之曰三百年無此孤寒榜也復  
至武林病卒子眉國子學正有高才世其家學  
羅必顯字揚庭豫章一峯後裔前萬歷己酉副車貢  
成均宅邑之蓮花橋遂占籍焉少研精理學以課  
授生徒爲業嘗夜歸過螺南巷口遇以索債投繯  
懸而未絕者救甦代償其債子德御邑庠生

羅秉倫字振爨德御子康熙癸丑進士選庶吉士轉  
河南道御史遷大理寺寺丞累官通政使少爲諸  
生時有文名督學簡公曰此金馬玉堂人物後其  
言果驗在朝直已行道不隨人唯諾世以稱名臣

云

蔡祖庚字蓮西號抑菴順治己丑進士祖時榮字守塘歲貢生有陰德力行善事父屏周號二白萬歷乙卯舉人任浮梁縣事抗建魏忠賢生祠降職府照磨累官兵部職方司郎中誥授中憲大夫庚起家甘泉令殫心經理民用乂安奉有急公好義之旨陞戶部遷太原改眞定守戒屬員省事省刑與民休息尤以甄拔人材爲意轉河南副使補任粵西以親年及耄乞休歸養子堡

蔡堡字鉉升號甘泉康熙庚辰進士由中書授甌寧

上元縣志

卷十六

邑獻

四十七

令甌邑產米奸賈輿販出洋米價騰貴致民艱食  
堡牒各憲勒石嚴禁決獄明慎五年中未有入人  
重辟者攝崇安改建文廟嚮分校文武兩闈時稱  
得人致仕歸居鄉醇謹寄輿篇章有香草堂集已  
西鄉飲大廩

論曰孔子謂杞宋不足徵惜其文獻稍缺耳劉白  
兩氏兄弟本故明碩俊負秣陵重望官之蒞茲土  
者胥叩門請謁詩曰雖無老成人尚有典型其斯  
之謂與羅必顯襲一峯家學跡其螺南巷早行一  
事宜其孫秉倫之官中憲也蔡蓮西世居龍都鄉

科名蟬翼代有聞人予故備著之以告世之有隱  
德者

